

REGLUGERÐ um ábyrgðadeild fiskeldislána.

1. gr.

Ábyrgðadeild fiskeldislána er sérstök deild við ríkisábyrgðasjóð. Ábyrgðadeildin lýtur stjórn fjármálaráðherra. Hlutverk hennar er að tryggja með sjálfskuldarábyrgð greiðslu eldislána, sem bankar og aðrar lánastofnanir veita eða útvega innlendum fiskeldisfyrirtækjum skv. því sem kveðið er á um í lögum nr. 17/1990, um ábyrgðadeild fiskeldislána.

2. gr.

Fjármálaráðherra skipar 5 manna stjórnarnefnd ábyrgðadeildar til 4 ára í senn, einn samkvæmt tilnefningu viðskiptaráðherra, einn samkvæmt tilnefningu landbúnaðarráðherra og þrjá án tilnefningar og skal formaður skipaður úr þeirra hópi. Jafnframt skulu skipaðir fimm varamenn með sama hætti.

Stjórnarnefndarmaður skal ekki taka þátt í meðferð máls ef hann er stjórnarmaður eða starfsmaður viðkomandi fyrirtækis eða þeirrar lánastofnunar, sem er í viðskiptum við viðkomandi fyrirtæki. Hann skal einnig víkja ef hann er fjárhagslega háður fyrirtæki vegna eignaraðildar, viðskipta eða af öðrum ástæðum. Sama gildir ef stjórnarnefndarmaður er svo persónulega tengdur umsækjanda að hætta er á að hann fái ekki litið hlutlaust á mál.

Óheimilt er starfsmönnum, stjórnarnefndinni og trúnaðarmönnum hennar að láta óviðkomandi aðilum í té nokkuð af þeim upplýsingum, sem gefnar eru í sambandi við ábyrgðarbeiðnir umsækjenda.

Til þess að fundur stjórnarnefndar sé lögmætur, þarf meiri hluti stjórnarnefndar að sitja hann og ræður einfaldur meirihluti ákvörðun stjórnarnefndar.

3. gr.

Verkefni stjórnarnefndar ábyrgðadeildar eru eftirfarandi:

1. Fjalla um allar umsóknir um sjálfskuldarábyrgð er berast skv. lögum um ábyrgðadeild fiskeldislána og afgreiða þær, sbr. 4. gr.
2. Sjá um að gerður sé þrihliða samningur milli umsækjanda, lánastofnunar hans og ábyrgðadeildarinnar, sbr. 4. gr.
3. Gera tillögur um iðgjald skv. 6. grein fyrrgreindra laga, sbr. 5. gr.
4. Athuga kjör og form þeirra lána sem óskað er eftir að tryggð verði, m.a. með tilliti til þess að þau samrýmist sjálfskuldarábyrgð ríkissjóðs, sbr. 6. gr.
5. Að hafa eftirlit með því að nægileg veð séu fyrir hendi til tryggingar þeim lánnum sem ábyrgðadeildin hefur veitt ábyrgð á, sbr. 7. gr.
6. Gæta þess að váttryggingar séu fullnægjandi, sbr. 7. gr.
7. Annað það er hún telur nauðsynlegt til þess að gæta hagsmuna ábyrgðadeildarinnar.

4. gr.

Fiskeldisfyrirtæki sem æskir ábyrgðar deildarinnar skal sækja um hana til stjórnarnefndar ábyrgðadeildar á þar til gerðum eyðublöðum og með þeim upplýsingum sem stjórnarnefnd ábyrgðadeildar ákveður.

Stjórnarnefnd fjallar um hverja umsókn og afgreiðir á grundvelli ítarlegs mats á stöðu og rekstraröryggi viðkomandi fyrirtækis. Fyrirtæki koma því aðeins til álita við veitingu sjálfskuldarábyrgða að grundvöllur teljist vera fyrir rekstri þeirra til lengri tíma. Jafnframt ákveður stjórnarnefndin með hvaða kjörum deildin veitir ábyrgð.

Ábyrgð skal ekki veitt nema:

- a) Umsækjandi hafi afurðalán hjá banka eða annarri lánastofnun vegna sömu afurða án ábyrgðar ábyrgðadeildarinnar.
- b) Umsækjandi hafi tryggt afurðir sínar á fullnægjandi hátt.

Áður en ábyrgð er veitt skal gerður þríhliða samningur milli umsækjanda, lánastofnunar hans og ábyrgðadeildar þar sem kveðið er á um:

- a) Eftirlit með verðmæti hins veðsetta.
- b) Að ekki séu veitt ný lán þegar hætta er talin á að ekki náist full skil við sölu afurðanna.
- c) Að söluandvirði hinna veðsettu afurða renni óskert til greiðslu þeirra lána sem ábyrgðadeildin hefur ábyrgst, auk þeirra lána sem lánastofnun hefur 1. veðrétt fyrir.
- d) Önnur þau atriði er rétt þykir að mati aðila að hafa í slíkum samningi.

5. gr.

Stjórnarnefnd gerir tillögur til ráðherra um þau iðgjöld sem greiða skal fyrir sjálfskuldar-ábyrgðir. Iðgjöld skulu við það miðuð að deildin sé rekin hallalaus. Umsækjandi skal hlutast til um að banki sá eða lánastofnun, sem veitir afurðalán gegn ábyrgð deildarinnar innheimti iðgjald deildarinnar með því að draga það frá við útborgun afurðalánsins og/eða af andvirði veðsettra afurða og skila deildinni iðgjaldinu.

6. gr.

Gjalddagi þeirra lána sem ábyrgðadeild tekur sjálfskuldarábyrgð á skal ætíð miðast við skil á söluandvirði þeirra afurða sem lánað var út á, eða að verðmæti þau sem lánað var út á séu ekki lengur fyrir hendi.

7. gr.

Ábyrgðadeildin skal taka veð í eldisstofni til tryggingar þeim lánnum, sem hún veitir sjálfskuldarábyrgð á. Á undan í veðröð mega eingöngu hvíla þau veð sem lánastofnanir hafa tekið vegna lána sem þau veita viðkomandi fyrirtæki sbr. 2. og 4. gr. laga nr. 17/1990, um ábyrgðadeild fiskeldislána. Verðmæti þau sem sett eru að veði til tryggingar áhættu ábyrgðadeildarinnar skulu ávallt vera váttryggð á fullnægjandi hátt. Meðan fiskeldisfyrirtæki nýtur ábyrgðar ábyrgðadeildar er því skylt að hlíta fyrir mælum stjórnarnefndar um váttryggingu. Getur stjórnarnefnd, ef misbrestur verður á greiðslu iðgjalds af þeim tryggingum, látið greiða það á kostnað ábyrgðarþega.

8. gr.

Bókhald ábyrgðadeildarinnar færast í ríkisábyrgðasjóði. Rekstri ábyrgðadeildarinnar skal haldið aðgreindum frá öðrum rekstri ríkisábyrgðasjóðs.

9. gr.

Nú verða vanskil á láni, er ábyrgðadeildin hefur tekið sjálfskuldarábyrgð á, og getur þá lánveitandi krafðið ábyrgðadeildina beint um greiðslu skuldarinnar og þarf ekki að ganga að öðrum tryggingum vegna hennar. Lánveitandi getur ekki talið alla skuldina fallna í gjalddaga vegna vanskila, nema hann hafi áður krafðið ábyrgðadeildina skriflega. Ábyrgðadeild getur ætíð leyst skuldina alla til sín, ef hún óskar þess. Nú leysir ábyrgðadeildin skuld til sín, og skal þá lánveitandi framselja ábyrgðadeildinni allan þann rétt, er hann kann að eiga á hendur skuldara, eða öðrum, vegna skuldarinnar, og getur ábyrgðadeild þá eindagað skuldina gagnvart skuldara, ef hún telur ástæðu til.

10. gr.

Reglugerð þessi er sett með heimild í 7. gr. laga nr. 17/1990, um ábyrgðadeild fiskeldislána.

Fjármálaráðuneytið, 3. maí 1990.

Ólafur Ragnar Grímsson.

Snorri Olsen.

REGLUGERÐ**um skil á staðgreiðslu.**

1. gr.

Launagreiðandi skal ótilkvaddur skila skilagrein og því staðgreiðslufé sem honum bar að halda eftir eigi sjaldnar en mánaðarlega.

2. gr.

Staðgreiðslufé ber að skila inn á gíróreikninga 778899 í Landsbanka Íslands, aðalbanka, 025025 í Seðlabanka Íslands eða til innheimtumanna staðgreiðslu sbr. 5. gr. reglugerðar þessarar.

3. gr.

Með skilum skal launagreiðandi ætíð láta fylgja skilagrein í því formi sem ríkisskattstjóri ákveður sbr. ákvæði 20. gr. laga nr. 45/1987, um staðgreiðslu opinberra gjalda. Ef skilafé er skilað í banka, sparisjóð eða pósthús sem innborgun inn á gíróreikning skv. 2. gr. reglugerðar þessarar, skal skilagrein vera í formi gíróseðils fyrirfram áritaðs af ríkisskattstjóra.

Skilagrein skal skila mánaðarlega enda þótt engin laun hafi verið greidd eða persónuafsláttur launamanna veldur því að engin staðgreiðsla hafi verið tekin af starfsmönnum.

Gjalddagi vegna greiðslutímabils liðins mánaðar er 1. dagur næsta mánaðar á eftir en eindagi 14 dögum síðar. Ef eindaga ber upp á laugardag, sunnudag eða helgidag flyst hann til næsta virks dags þar á eftir.

4. gr.

Bankar, sparisjóðir og pósthús sem veita viðtöku staðgreiðslufé inn á gíróreikning staðgreiðslu skulu því aðeins taka við innborgunum inn á gíróreikninginn að greiðslu fylgi sérstakur gíróseðill sbr. ákvæði 3. gr. reglugerðar þessarar og 20. gr. laga nr. 45/1987, um staðgreiðslu opinberra gjalda.